

Mchungaji Hutangulia

Naye awatoapo nje kondoo wake wote, huwatangulia; na wale kondoo humfuata, kwa maana wajua sauti yake—Yohana 10:4.

Mchungaji wa nchi za Mashariki hakuwaswaga kondoo wake. Hakutegemea nguvu wala hofu, ila akiwatangulia, anawaita. Wanajua sauti yake, na wanatii wito. Vivyo ndivyo na Mchungaji ambaye ni Mwokozi ndivyo anavyofanya kwa kondoo Wake. Maandiko yanasema, “Uliwaongoza watu wako kama kundi, Kwa mkono wa Musa na Haruni.” Kupitia kwa nabii, Yesu anasema, “Nimekupenda kwa upendo wa milele, ndiyo maana nimekuvuta kwa fadhili zangu.” Hamlazimishi yeyote kumfuata. Anasema, “Naliwavuta kwa kamba za kibinadamu, kwa mafungo ya upendo” (Zaburi 77:20; Yereimia 31:3; Hosea 11:4).

Siyo hofu ya adhabu, wala matumaini ya thawabu ya milele, vinavyowafanya wanafunzi wa Yesu kumfuata. Wanauona upendo wa Mwokozi usio kifani, uliodhihirika katika safari Yake yote duniani, kutoka katika hori la Bethlehemu hadi msalaba wa Kalvari, na kumwona kunavuta, kunalainisha na kunatiisha nafsi. Upendo unaamka katika mioyo ya watazamaji. Wanaisikia sauti Yake, na wanamfuata.

Kama mchungaji anavyowatangulia kondoo wake, na kukumbana kwanza na hatari zilizoko njiani, ndivyo Yesu anavyofanya kwa watu Wake. “Naye awatoapo nje kondoo wake wote, huwatangulia.” Njia ya mbinguni huwekwa wakfu na nyayo za Mwokozi. Njia inaweza kuwa ya mwinuko wa ghafla na yenye vilima vyenye mawe, lakini Yesu ameipita njia hiyo; miguu yake imeigandamiza chini miiba mikali, ili afanye njia ya kupita kuwa rahisi kwetu. Kila mzigo ambao tunaitwa kuubeba Yeye mwenyewe aliubeba.

Ingawa sasa amepaa kwenda katika uwapo wa Mungu, Naye anashiriki katika kiti cha enzi cha ulimwengu, Yesu hajapoteza hata chembe ya asili Yake ya huruma. Leo moyo ule ule wa upole, wenye huruma umefunguliwa kwa ajili ya shida zote za wanadamu. Leo mkono ule uliotobolewa na msumari umenyoshwa ili kuwabariki watu wake waliomo ulimwenguni kwa baraka tele. Anasema: “Wala hawatapotea kamwe, wala hakuna mtu atakayewapokonya toka mikononi mwangu.”

Roho ambayo imejitoa kwa Kristo ni ya thamani sana machoni Mwake kuliko ulimwengu wote. Mwokozi angeweza kupitia maumivu makubwa ya Kalvari ili mtu mmoja apate kuokolewa kuingia katika ufalme Wake. Kamwe hatamwacha mtu yeyote ambaye kwa ajili ya huyo alikufa. Isipokuwa watu Wake wamechagua wenyewe kumwacha, Atawashikilia imara.

Katika taabu zetu zote tunaye Msaidizi asiyeshindwa. Hatuachi peke yetu kupambana wa jaribu, kupigana vita na uovu, na hatimaye kuangamizwa na mizigo na huzuni. Ingawa sasa amefichika asiweze kuonekana kwa macho haya ya kibinadamu, sikio la imani linaweza kusikia sauti Yake akisema, “Usiogope; Mimi nipo pamoja nawe.” “{Mimi ni yule} aliye hai; nami nalikuwa nimekufa, na tazama, ni hai hata milele na milele” (Ufunuo 1:18) (Tumaini, seh. ya 2, uk. 93–95).